

## FOR SERMON

**March 27, 2016**

**Domingo Sabet/Alleluya:**

**Leksion 18: TI BALLIGI TI MANGISALAKAN A NAILANSA ITI KRUS**

**Daan a Tulag: Dagiti Salmo 118:26**

**Daan a Tulag: Job 19:25-27**

**25** Ket siak pagaammok unay a ti mannubbotkoa sibibiag, Ken, um-umay a sumaruno kaniak, tumakderto iti rabaw ti tapok.

**26** Ket kalpasan ti kudilko, a linalatda,— isu daytoy! Kaskasdi iti kinakebbet ti lasagko makitakto ti Dios,

**27** Nga uray siak a mismomakitakto, Ket pudno unay a makitanto dagiti mismo a matak, ngem saan a ti maysa a ganggannaet.

Dagiti bekkelko nagkapuyda iti kaunggak.

**Baro a Tulag: Lukas 24:1-12**

Nupay kasta, iti umuna nga aldaw ti lawas, napanda a nakasapsapa iti tanem, nga inkuyogda dagiti especial nga insaganada. **2** Ngem nasarakanda a ti bato naitulid manipud iti pakalaglagipan a tanem, **3** ket idi simrekda saanda a nasarakan ti bagi ni Apo Jesus. **4** Bayat a nariribukanda maipapan itoy, adtoy! nagtakder iti sibayda ti dua a lallaki a sumilsilap ti pagananayda. **5** Idi a nagbuteng dagiti babbai ket pinagtalinaedda a sidudumog dagiti rupada iti daga, kinuna kadakuada dagiti lallaki: “Apay a sapsapulyenyo kadagiti natay Daydiay sibibiag? **6** [[Awan ditoy, no di ket naibangonen.]]n Lagipenyon kasano a nagsao kadakayo bayat nga adda pay laeng idi idiy Galilea, **7** a kinunkunana a ti Anak ti tao masapul a mayawat iti im-ima dagiti managbasol a tattao ken mailansa ket kaskasdi nga iti maikatlo nga aldaw bumangon.” **8** Gapuna nalagipda ti sasaona, **9** ket nagawidda manipud iti pakalaglagipan a tanem ket amin dagitoy a banagimpadamagda kadagiti sangapulo ket maysa ken iti amina sabsabali. **10** Isuda idi da Maria Magdalena, ken Juana, ken Maria nga ina ni Santiago. Kasta met, ti sabsabali kadagiti babbai a kaduada ibagbagada dagitoy a banag kadagiti apostol. **11** Nupay kasta, dagitoy a sasao nagparang a kasla awan kaes-eskanna kadakuada ket saanda a patiend dagiti babbai. **12** [[Ngem timmakder ni Pedro ket nagtaray a napan itipakalaglagipan a tanem, ket, idi nagrukob, dagiti laeng patapat ti nakitana. Gapuna pimmanaw, nga agsidsiddaaw itiu negna maipapan iti napasamak.

## Pannakailawlawag ti Teskto

Ti tekstotayo iti Job ket paset dagiti un-unnoy ni Job iti Dios kaduana dagiti gagayyemna gapu iti nakaro a panagsagabana, a kasla ket tay dusdusaen ti Dios. Agsalsaludsod ni Job a mangut-utob no apay a pinalubosan ti Dios nga agsagaba iti saem ken panakaibabain. Iti baet dagitoy nga arungang ken reklamo ni Job, agtultuloy

ti namnamana iti kaadda ti biag a nasaysayaat iti likudan ti panagsagaba, dumtengto ti panawen a makitana ti Dios iti rupanrupa. Iti baet ti bileg ni patay, nakita ni Job ti kaadda ti biag. Ta ti patay ket saan nga isu ti pagpatinggaan ti amin, ta ti naituding a pagtungpalaan ti amin ket isu ti panakaikappia ken panakaitipon iti Dios.

Natay ni Jesus ket kasla nagballigi dagiti kabusorna a nanglapped iti panakaiwarnak ti Ebanghelio, ken panakaipasdek ti Pagarian ti Dios. Naibabain babaen iti nadangkok a panakailansa iti krus gapu iti panagtulnogna iti Dios Ama, agmaymaysa a nagsagaba gapu ta tinalikudan dagiti adalanna, ngem iti maysa a bigat, nasdaaw da Maria Magdalena, Juana ken Maria nga ina ni Santiago ta awanen ti bagi ni Jesus iti nakaitanemanna, imbaga ketdi ti dua a lallaki a nagungaren ti Apo. Napan imbaga ngarud dagiti babbai ti napasamak kadagiti adalan, ngem saan a namati dagitoy, ta impagarupda a parbo a sarita laeng dagiti babbai dagitoy, banag a mangipakita iti nababa unay a pangibilangan dagiti lallaki kadagiti babbai idi a panawen. Nalipatan dagiti adalan ti imbaga idi ni Jesus a panagsagaba ken ipapatayna, ngem agungar iti maikatlo nga aldaw, daytoy a kinakurang ti pammati dagiti adalan ket iladawan ti panagtaray ni Pedro a napan iti tanem tapno penkenna no pudno ti impadamag dagiti babbai.

Pinili ni Jesus ti napan idia Jerusalem, saan laeng a tapno sangoenna dagiti agtuturay, ngem tapno ipatungpalna ti panggep ti yaayna kas mangisalikan. Ti panangsangona iti nakababain a kita ti ipapatay.

Daytoy a panakatay ken panagungar ni Jesus ket saanna laeng a pinarmek ni patay, ngem inawatna pay ti sagut ken panakabalin ti panagungar. Daytoy a panagungar ket isut kadakkelan a sagut iti sangataoan, nangruna dagiti kas ken Jesus ti panagsagaba ken panakatayda. Daytoy a panagungar ket maysa a pamasingked iti dalan ni Jesus kas Mangisalikan, tapno dagiti nagsagaba ken natay kas iti panagsagaba ken panakatayna ket mapadasanda met ti napadasanna.

Kas surotentayo ti Mangisalikan, naayabantayo iti isu met la a tukad ti kinatulnog ken tured a kas kenkuana, tapno sangoentayo dagiti aniaman a turay ken panakabalin a mangirurumen ken manggun-gunday kadagiti nakapuy. Naisangoltayo tapno aramidentayo met dagiti inaramidna, ta ti panagungar ni Jesus ket ipalagipna kadatayo a mapagballigiantayo met ti panagsagaba ken uray pay ti panakatay kas ituloytayo a suroten ti dana ni Jesus. Ti panagungar ni Jesus ket inyawatna kadatayo ti namnama a babaen iti panagtulnogtayo iti Dios, awatentayo met ti sagut ken panakabalin ti panagungar.

## TARABAY KADAGITI MANGIDALAN

Inuy-uyaw dagiti nangparigat ken pinanawan dagiti kasingedan a gagayyemna, binulosan ni Jesus ti kaudian nga angesna a kakuyog ti katalgedan a napagballigianna ti mision a nangibaonan ti Dios kenkuana. Aniaman ti agur-uray kenkuana kalpasan ti pannakailansana, inted ti Dios ti sungbat a saan a dinawat ni Jesus. Naited ken Jesus ti bendision nga iti kaanom saan a naiyawat iti siasinoman-ti pannakabalin ti pannagungar.

Saan laeng nga inalaw ti Dios ni Jesus iti lubong dagiti natay nga isu ti naituding a pagtungpalan ti amin a sibibiag. Inted ti Dios kenkuana ti pannakabalin ti pannagungar a saan nga inted ti agnanayon a Dios iti siasinoman. Manipud iti daytoy a pannakabalin ti Dios, naited ken Jesus ti amin a pannakabalin a pakairanudan dagiti amin a mamati ken sumurot kenkuana. Saan laeng a sinungbatan ti Dios ti saludsod ni Jesus maipanggep iti napasamak kenkuana, ngem pinagbalinna pay ti pannagungarna a pagtungpalan ti amin a mamati a mangibaklay iti krusda maipaay ken Jesus.

Maysa pay a sungbat ti Dios ken Jesus ket ti panangpasingked ken panangtakderna iti dana ti kinalinteg a sinurot ni Jesus. Imbaklay ni Jesus ti pakadagsenan dagiti agsagsagaba iti panakaabuso, panakaidadanes, panakabaybay-an, panakatagtagibassit manipud kadagiti dakes a pannakabalin nga agturturay iti kagimongan.

Idinto a maikari la unay iti pammadayaw, ad-adda a tinagibassit, indadanes ken imbilangda a kriminal ket nagsagaba iti pammapatay a saan koma a rumbeng a para kenkuana. Ngem babaen iti pannagungarna, intandudo ti Dios ti panangpilina a makipagsagaba kadagiti tattao. Saan man a naan-anay a nabaliwan ti lubong idi panawen ni Jesus, ngem binigbig ti Dios ti inlungalongna a panagbiag iti kinapudno ken hustisia kas umisu a dalan para iti pannakaipasdek ti Pagarian ti Dios ditoy lubong. Ti pannagungar ni Jesus ket isu ti naan-anay a pammaneknek iti yaanamong ti Dios iti nagapuanan ken naipatungpal ni Jesus a pagrebbenganna ditoy lubong.

## **BODY:**

(naisalin iti iluko manipud ken Levi Oracion- "Unless a Seed Falls and Dies")

## **TI IMPORTANSIYA KEN KAYAT A SAWEN TI PAMMATI MAIPAPAN ITI PANANGUNGAR**

Ikablaawko ti napateg a nagan ti Dios isu a Dios ken Manubbot, Manarawidwid, Namarsua kadatayo-isu a sibibiag iti nagbabaetantayo.

Kayat ko man a rugian daytoy nga pakisarsaritaak kadakayo ti maysa nga saludsod? Wenno saludsodek man kadakayo- kadatayo a namati (Kristianos) ania ti kadaegan wenno kangatuan a kaipapanan ken importansiya ti panangungar ni Jesus?

**Umuna**, ti panangungar kayatna a sawen ti balligi manipud ipapatay-ti kangrunaan a kabusor ti biag. Ti panangungar ni Jesus ipasimudaagna ti pammatalged ti Dios nga ti ipapatay ken saan nga isut pagpatinggaan ti biag. Ti kinapudno ket nagtaud iti Ebanghelio nga ti husticia, ayat, kappia, ti pudno ket saan a pulos nga abaken ti kinatao no di ket masnop nga agpannuray ditoy lubong. Maipatalged ngarud nga ti panangungar ni Jesus pinarmekna ti bileg ni patay kadagiti isuamin a mamati ken Jesus. Isu a ni San Pablo kunana; O patay sadinno ti pannilud! O patay sadinno ti pannakabalinmo! (I Cor 15:55)

**Maikadua**, ti panangungar ni Jesu Cristo mangted ti sibibiag ken naisangsangayan a pannakabalin kadagiti isuamin a mamati a tumakder iti kinapudno, panagayat ken husticia nga addaan kinasirib iti kinapudno nga agtaud iti Dios. Uray kadagiti mangidaton biagda para iti trabaho ti Dios maaddaan ti pannakabalin tapno maikkat ti kawar ni panagbuteng ta ti ipapatay ket ordinaryo a pasamak ti panagbiag.

**Maikatlo**, ti panangungar ni Apotayo nga Jesu Cristo ket mangparnuay ti dakkel ken naindaklan a namnama iti puso ken panunot dagiti isuamin a mamati gaputta napagballigianna amin nga problema ken kinarigat tapno ituloy nga isunson ti misyon ken aramid ti Iglesia. Gapu iti panangungar masirmata dagiti mamati ti namnama iti baet ti adu nga oposisyon- dakkel man wenno bassit-ta ni Jesus inpakitana ti Nakristianuan a tured ken determinasyon.

**MAIKAPAT**, ti panangungar ni Jesus sirmataenna ti pannakaipasdek ti baro a siudad no sadinno nga addaan ayat, kinapudno ken husticia ngamin dagitoy saan a masarakan ditoy lubong. Ti Libro ni Hebrews ipakdaarna nga “ditoy saan a makita ti agnanayon nga siudad no di ket paspasungadentayo iti pannakaipasdekna gapu kadatayo. Pudno nga iti daytoy a lubong temporario dagiti banbanag ngem masapul nga agtrabaho tunggal maysa para iti ayat, kappia ken husticia, dagitoy a tallo masapul nga maipasdek iti lubong.

**MAIKALIMA**- ti panangungar ni Jesus ipasimudaagna nga adda pammatalged nga adda proceso ti pannakawayawaya a mapaspasmak iti biagtayo ken iti pakasaritaan isu a naipakita iti biag, ministeo ken panangungar ni Jesus. Nakidangadang ni Jesus ket inpakitana ti kinapudnona iti misyon ken panangikomitna iti biagna iti trabaho nga inpakomit ni Amana. Nasaem a panunoten nga gapu iti kinapudno nga inlungalong ni Jesus isu met ti gapu ti pannakapapatayna ngem saan a nagpatingga dita no di ket gapu itoy mapatibker dagiti mamati nga makipagsagaba a biruken ti kinapudno, husticia, pannakawayawaya, ayat ken kappia.

**MAIKAINNEM**, ti panangungar ni Jesus ipakitana wenno idariragna ti masakbayan ti pannakaipasdek ti “baro a langit ken baro a daga.” Babaen iti panagmaymaysa maipasdek ti Pagarian ti Dios ditoy daga babaen kadagiti biag ken dakulaptayo nga agtrabaho. Ta dayta a baro nga langit ken baro a daga agari ti ayat, kappia ken husticia.

Amin dagitoy a kaipapanan ti panangungar ni Jesus pinarmekna dagiti panagduadua, pinarmekna dagiti naturay ken nabileg babaen iti panagsagaba ni Jesus idiyay kruz. Kitaenyo kakabsat ti nailansa a Dios- kinargana ti panagsagaba babaen iti kruz ngarud saan nga sinsinan wenno asi-asi ti trabaho a naipakomit kadatayo (not cheap and easy Christianity) no di ket di aramid daytoy a nanakman ken agbalintayo a creative enough nga tumulong iti trabaho ti Apo. Ti panangungar ni Jesus maipakita ti kinadayag ti Apo kadatayo.. Pudno a nagbiruktayo ti itlog-parbangon a nagriingtayo nga immay- agbautisartayo ngem masapul ng akas nangungar ni Jesus makipagungartayo kadagiti agkakaimbag ken agkakasayaat nga aramid kenkuana. Ipaay ti biag, dagiti adda kadatayo a makipagtrabaho ti pannakaipasdek ti ayat, kappia ken husticia. Daytoy ti nalatak a balligi ti nailansa a Messias. Amen!